

BERTSO BERRIAK

Jexux Mari Irazu

Oroiminari jarriak

DANI BLANCO



Azaroak 10, Memoria Eguna, indarkeriaren biktimen omenez.

I

Azaroa zeren hazi?
Goitik dena dator gazi
hauxe falta zen, memoriari
oroitzea galerazi.

II

Alzheimerraren eztena
justu kontrako eskema:
Oroiminaren hasiera da
gogoratu nahi ez dena.

III

Ukatuak, omenduak
bizia emanak, kenduak...
Zauria ireki egin behar du
aitortzaren ukenduak.

IV

X jauna iraganaz
kezkaz eta tripak janaz...
Damu zalantzez hizketan, damu
gehiago hil ez izanaz.

V

Azaroaren hamarra
denboralearen garra
bera eske itsasoa ta
memoriaren indarra.

VI

Memoriaren Egunean
neu ere begirunean.
Ahaztu gabe oroitzekoak
justu biharamunean.

VII

Alde bakarreko grinak
begi bakarreko minak
igual arrazoi izango dute
denak ez dira berdinak.

VIII

Joseba Arregi zena
tortura oihu ozena
gero Meliton ta konpainiak
dute biktima izena.

IX

Ehunka, ez bost ta ez zazpi
hotzikararen argazki
Durangon ere ikusiko da
“Gernika ez zutela aski”.

X

Zenbat gorpu ta arima
behar ditugunak mima
baina lehenbizi argituta zein,
noren ta zeren biktima.

DOINUA: “Oihaneko pagoak blai”.



Bidali zure sortak bertsoak@argia.com helbidera. Aukeratuak orri honetan argitaratuko ditugu.